

元代史書 四卷

元
代
史料
叢刊
初編

泰山書社

楊璩字元度餘姚州人服膺朱子之學著詩傳名物類考御史姚黻上於朝歷寧海縉雲學正卒同郡夏泰亨字叔通九歲能文官翰林編修著詩經音考矩軒集又安城人劉瑾字公瑾博通經史著詩傳通釋二十卷采錄各經傳及諸儒所發要義最爲詳博其書盛行於世王天與字立大江西北吉安人研精覃思著尚書纂傳四十六卷十五年而後成書雖心薄蔡沈然亦間擇其說後江西人王充耘元統中進士著讀書管見二卷考訂蔡傳尤爲精核焉

黃景昌字明遠浦江人通尚書春秋之旨嘗言自公穀口說相傳至漢然後著之竹帛故經有脫編有錯簡學者上畏聖經下避賢傳訛舛誣漏莫之敢較其春秋公穀舉傳論及三代用正日夜食之辨凜凜不可屈後得巴州陽恪春秋考正一卷言三代悉用夏時不改月景昌明其不然作周正如傳考三卷謂周改月並改時左

傳去夫子時近當如傳所云也

俞臯字心遠新安人幼師宋進士趙良鈞得春秋大旨自晉杜氏注左傳始有凡例之說取經之事同辭同者計其數凡若干而不考其義唐陸氏學於啖趙作纂例一書雖分晰詳備亦未嘗以義言之逮程子爲傳始分別義例臯一遵程說以義同事同辭同者定爲例十六條其有義不同而辭同事同而辭不同者則分見各事之下名春秋斷義又魯震字樵南廬陵人時設科以春秋胡傳與三傳並用學者困於繙閱未有能合爲一書者震次第集之始左氏次公次穀次胡氏而取止齋陳氏說附於後凡胡氏有所引用皆分注其下別爲類編以附於卷後名春秋五傳與臯書俱有便於學者

熊復字庶可南昌人以五經教授鄉里學者稱西雨先生著春秋會傳吳徵見而稱之跋其後曰邵子曰聖人之經渾然無迹如天道焉故春秋書實事而善惡形乎

其中世之學者率謂聖人有意褒貶三傳去聖人未遠已失經意况後之注釋者乎唐儒惟啖趙二家獨究聖人之旨宋清江劉原父其次也熊君所輯會傳合之諸家注釋未有能精擇審取如此者同縣毛應龍字介石大德間爲澧州教授著周禮集傳二十四卷周官或問五卷總諸儒訓釋而斷以己意其學亞於復云

烏冲大甯路川州人祖塔塔兒台太祖伐金率軍民詣河北迎降賜名侈給虎從太師國王南伐累官龍虎衛上將軍易州崇甯軍節度使行川州元帥府事父禔襲父職充北京路總管佩虎符累官河北河南道提刑按察使冲明經勵行初從容城劉因受業冠服車騎甚都改費見師三日不返諸生皆曰是豈眞實爲學者翼日冲服儒服執經趨席舉動如寒士諸生嘖嘖稱歎因亦奇之冲爲學清苦晝誦夜思至忘寢食居喪三年不入於內家日落日宴不食意泊如也眞定安熙欲從因學

不果冲盡以所得告之熙卒爲名儒卒贈祕書省祕書郎

黃澤字楚望本長安人唐末其遠祖舒藝知資州內江縣子孫遂爲資州人父儀可累舉不第從兄驥子官九江蜀亂不能歸因家焉澤生有異質慨然以明經學道爲志好爲苦思屢以成疾疾止復思久之如有所見作顏淵仰高鑽堅論蜀人治經必先古注疏澤於名物度數考覈精審而義理一宗程朱作易春秋二經解二禮祭祀述略大德中江西行省聞其名授江州景星書院山長使食其祿以施教又改洪州東湖書院山長受學者益衆始澤嘗夢見夫子以爲適然旣而屢夢見之最後乃夢夫子手授所校六經字畫如新由是深有感發始悟所解經多徇舊說爲非是乃作思古吟十章極言聖人德容之盛上達於文王周公秩滿卽歸閉門授徒以養親不復言仕嘗以爲去聖久遠經籍殘闕傳注家

率多傳會近世儒者又各以才識求之故議論雖多而經旨愈晦心積誠研精有所悟入然後可以窺見聖人之本真乃揭六經中疑義千有餘條以示學者既乃盡悟失傳之旨自言每於幽閒寂寞顛沛流離疾病無聊之際得之及其久也則豁然無不貫通自天地定位人物未生已前沿而下之凡遠古之初萬化之原載籍所不能具者皆昭若發蒙如示諸掌然後由伏羲神農五帝三王以及春秋之末皆若身在其間而目擊其事者於是易春秋傳注之失詩書未決之疑周禮非聖人書之謗凡數十年苦思而未通者皆渙然冰釋各就條理故於易以明象爲先以因孔子之言上求文王周公之意爲主而其機括則盡在十翼作十翼舉要忘象辯象略辯同論於春秋以明書法爲主其大要則在考覈三傳以求向上之功而脈絡盡在左傳作三傳義例考筆削本旨又作元年春王正月辯諸侯娶女立子通義魯

隱公不書卽位考殷周諸侯禘祫考周廟太廟單祭合食說作丘甲辯以明古今禮俗不同見虛辭說經之無益嘗言學者必悟經旨廢失之由然後聖人之本意見若易象與春秋書法廢失大略相似苟通其一則可觸機而悟矣又懼學者得於創聞不復致思故所著多引而不發作易學濫觴春秋指要示人以求端用力之方其於禮學則謂鄭氏深而未完王肅明而實淺作禮經復古正言如王肅混郊丘廢五天帝併崑崙神州爲一趙伯循言王者禘其始祖之所自出以始祖配之而不及羣廟之主胡宏家學不信周禮以社爲祭地之類皆引經以證其非其辯釋諸經要旨則有六經補注詆排百家異義則取杜牧不當言而言之義作翼經罪言近代覃思之學推澤爲第一吳澄嘗觀其書以爲平生所見明經之士未有能及之者謂人曰能言距楊墨者聖人之徒也楚望真其人乎然澤雅自慎重未嘗輕與人

言李河使過九江請北面稱弟子受一經且將經紀其家澤謝曰以君之才何經不可明然亦不過筆授其義而已若余則於艱苦之餘乃能有見吾非邵子不敢以二十年林下期君也河歎息而去或問澤自闕如此甯無不傳之懼澤曰聖經興廢上關天運子以爲區區人力所致耶澤家窶貧且年老不復能教授歲大祿家人采木實草根以療饑寒然不動其意惟以聖人之心不明而經學失傳若己有罪爲大戚至正六年卒年八十七

安熙字敬仲真定藁城人祖滔父松皆有學行熙既承家學及聞保定劉因而向慕之所居相距數百里將造其門而因已歿乃從因門人烏冲錄其遺書而還建祠堂以奉四世冠昏喪祭一遵文公禮書其教人以敬爲本以經術爲先弟子去來常至百人出入閭巷帶規佩矩望而知爲安氏弟子家居教授垂數十年四方來者

多所成就既歿鄉人立祠於棗城之西其門人蘇天爵輯其遺文爲默菴集十卷虞集序之曰使熙得見劉氏廓之以高明厲之以奮發則劉氏之學當益昌大於時云同郡焦悅字子和與熙講說六經之旨授真定學官學者稱兌齋先生

同恕字寬甫其先太原人五世祖遷陝西遂爲奉元人祖昇父繼先俱有學行廉希憲宣撫陝右辟掌庫鑰家世業儒同居二百口無間言至元間朝廷始分六部選名士爲吏屬關陝以恕貢禮曹辭不行仁宗踐阼卽其家拜國子司業使三召不起陝西行臺侍御史趙世延請卽奉元置魯齋書院以恕領教事延祐六年以左贊善召入見東宮賜酒慰問繼而獻書歷陳古誼盡開悟涵養之道明年春英宗繼統以疾歸致和元年拜集賢侍讀學士以老疾辭恕之學長於禮平居盛暑未嘗不冠帶居父喪哀毀幾喪明祭必如事生扁所居曰桀菴

與人交雖外無適莫而中有繩尺家無儋石之儲而聚書萬卷時蕭軒居南山下亦以道高當世入城府必主恕家恕自京還家居十三年海內並稱蕭同後至順二年卒年七十有八贈翰林直學士封京兆郡侯諡文貞其所著曰槩菴集二十卷弟子第五居仁字士安幼師蕭軒弱冠從恕受學博通經史躬率子弟力農而學徒滿門嘗行田間遇有竊其桑者自引避之鄰人借驟而死償其直不取曰物之數也何以償爲鄉里高其行誼率多化服稱曰靜安先生

敖繼公字君善福州長樂人後寓平江築一小樓坐卧其中日從事於經史趙孟頫其弟子也初爲定成尉以父任當得京官讓於弟尋擢進士對策忤時相遂不仕著儀禮集說十三卷大德中以高克恭荐授信州教授未仕而卒又同安人邱葵字吉甫著易解義書直解詩口義春秋通義周禮補亡等書泰定中馬祖常薦之未

及用而卒同時錢塘人孟文龍字震翁宋浙東提舉宋亡平章史弼等薦起之以死辭不出戶庭者三十年著周易大全二卷鹽城人秦玉字德卿通五經尤邃於詩門人私諡孝友先生

吳師道字正傳婺州蘭溪人弱冠讀宋儒真德秀書幡然有志於爲己之學又受業於同郡許謙登至治元年進士授高郵縣丞明達文法吏不敢欺再調甯國路錄事會歲大旱饑民仰食於官者三十三萬人師道勸富民捐粟三萬七千六百石又言於部使者請官粟四萬石鈔三萬八千四百錠振之饑民賴以存活遷池州建德縣尹郡學有田七百畝爲豪民所占師道按其圖籍悉歸於學建德素少茶而權稅重言於所司減權額民以不病中書左丞呂思誠侍御史孔思立薦爲國子助教尋遷博士六館諸生人人自以爲得師以禮部郎中致仕卒於家所著有易詩書雜說春秋胡傳附辨戰國

策校註敬鄉錄及文集二十卷同郡有王餘慶字叔善官江南行臺監察御史亦以儒學名重當世

陳普字尙德甯德人其學以四書五經爲本三辟福州路教授不起著四書句解鈴鍵學庸指要孟子纂圖周易解注尙書補微凡數百卷尊聞紹言屹然爲朱子嫡派隱居石堂山學者稱石堂先生

韓性字明善紹興人宋魏忠獻王琦八世孫也高祖左司郎中膺胃扈從南渡家於越性七歲讀書日記萬言九歲通小戴禮作大義文意蒼古老生宿學皆稱異焉及長博綜羣籍文辭博達儔儔自成一家言延祐初以科舉取士學者多請其程式性告以朱子學校貢舉私議俾從事根柢以應有司之求性出無與馬僕御所過負者息肩行者避道巷夫街叟至於童穉厮役咸稱之曰韓先生云憲府嘗舉爲教官不赴暮年愈自韜晦天歷中趙世延以名上聞後十年門人李齊爲南臺監察

御史力舉其行義而性已卒南臺御史中丞月魯不花嘗學於性爲請於朝賜諡莊節先生其所著有禮記說四卷詩音釋一卷書辨疑一卷郡志文集十二卷

熊良輔字任重江西南昌人延祐中鄉貢早師同縣熊凱學易復得進賢龔煥之易學先是朱子本義一遵呂祖謙所訂古文以六十四卦彖爻之辭爲上下經而孔子所釋彖象文言及上下繫說卦序卦雜卦爲十翼良輔著周易本義集成仍舊本上下經二卷謂之集成十翼十卷謂之附錄其所採摭自唐迄元凡八十四家其書盛行於世

陳櫟字壽翁新安人其學以朱子爲師自稱東阜老人延祐中貢於鄉因病固辭年八十三卒著四書發明書傳纂疏禮記集義等書崇仁吳澄嘗稱櫟有功於朱子凡來受業者澄皆謝之使受學於櫟焉

保八字公孟蒙古人少好學爲黃州路總管精易理著

易源奧義一卷周易原旨六卷仁宗在東宮保八進箋
曰自龍圖之畫既出而象數之學肇開至六十四卦以
成書爲百千萬年之明鑑義文孔子發先天之妙京費
王弼廣後世之傳豈但求語下之筌蹄又當參胸中之
關鍵凡蠡測管窺以探精義皆銖積月累以用深功苟
得其真敢私其秘不揆淺膚之素學冒干投進於青宮
冀虎闥齒胄之間特加披閱在鶴禁延儒之頃更賜表
章太子嘉納焉

曹元博以字行上海人著左傳序事本末楊維禎序其
書曰左丘明受經仲尼故作春秋傳爲聖經之案後之
傳左氏者有鐸椒作鈔撮八卷虞卿作鈔撮九卷惜其
文無傳漢張蒼賈誼復傳左氏河間王進於武帝至成
帝時劉歆校祕書見而存之始立左氏春秋逮晉杜預
復表章之而傳有注釋後世言春秋者舍左氏無以爲
統緒故止齋陳氏謂著其所不書以見經之所書者皆

左氏功此章指所由作也元博既按經以證傳復索傳以合經爲左氏序事本末可謂採蒐之精而權衡之審矣其爲維楨推重如此同時金谿人吳儀字明善其學以六經爲歸晚尤專心春秋謂聖人之經一而家異傳大道榛塞職此之由乃著三書曰裨傳曰類編曰五傳辨辭義嚴密每撫卷嘆曰此書吾積學所致後有楊子雲其將好之矣儀絕意仕進以壽卒

武恪字伯威宣德人吳澄爲江西儒學提舉薦入國學明宗在潛邸選爲說書秀才及出鎮雲南而恪從行明宗至陝西欲起兵恪諫曰太子南行於國爲君命於家爲叔父命何可違也若向京師發一矢史官必書太子反不可悔矣左右惡其言直遣之歸隱居教授文宗知其名除祕書典簿秩滿丁憂再除中瑞司典簿改汾西尹皆不就至正間泰不華舉爲沁水縣尹亦不赴近臣又薦爲授經郎恪陽爲疾病不與人接或問先生之學

以何爲本格日以敬爲本著有水雲集卒於家

列傳第一百三十三

新元史卷之二百三十六

賜進士出身日講起居注官翰林院侍讀國史館纂修膠州柯劭忞撰

儒林三

劉莊孫

劉彭壽

林起宗

戚崇增

程端禮

端學

倪淵

陳濬

師凱

劉友益

馮翼翁彭絲

宇文公諒

史季敷

趙有桂

閻人夢吉

陳剛

陳樵

牟楷